

Kitesurfing duai star a pèr cun tschels sports d'aua

Pliras moziuns en il parlament federal fan questa pretaisa

■ **(anr/vi) Il kitesurfing è scumandà sin ils lais svizzers – nun ch'ì exista ina lubientscha speziala. En il parlament federal datti pliras moziuns per abolir il scumond. A Silvaplauna ha Stefan Popprath fatg lavur da pionier per ils kilters.**

«Metter a pèr kitesurfing a tschels sports d'aua» è il titel da las moziuns ch'èn vegnidas inoltradas quest'emna. Politichers da differentas partidas s'engaschan, per exempel *Bastien Girod* (verds/ZH), *Bernhard Guhl* (pbd/AG), *Natalie Rickli* (pps/ZH) e *Hans Hess* (pld/OW). Tenor els n'èsi ozendi betg pli inditgà da scumandar il sport. Cuzunt damai che kitesurfing daventa ina nova disciplina als gieus olimpics il 2016 a Rio.

Guhl discorra da discriminaziun

«Mumentan vegnia quest sport discriminà en Svizra», di cusseglier naziunal Bernhard Guhl. Cura ch'ins haja cumenzà a far surfing cun il drag haja quai anc dà accidents. Ils ultims onns hajan ins sviluppà il material, la scolaziun saja sa meglierada e las mesiras da segirezza dals sportists sajan bunas. Kitesurfing na saja betg pli privlus che surfing cun tenda. «I na dat nagina raschun da discriminar ils kilters vivsavi ils surfers», di Guhl.

Ussa che kitesurfing saja ina disciplina olimpica na saja il scumond betg pli inditgà. «Noss sportists ston pudair trenar», di Guhl. L'acceptanza dal sport saja creschida considerablamain. Perfin Swiss sailing – l'associazion dals navigaturs a vela – s'engaschia per lubir il giuven sport.

Tenor lescha è quest sport d'aua da preschent scumandà – dano en lieus nua ch'ì existia lubientschas spezialas. Ils moziunaris vulan volver il moni e cuntanscher

che kitesurfing vegnia lubì sco ils auters sports d'aua.

Schicana sin il Lai Rivaun

Lubientschas spezialas datti sin plirs lais en Svizra, di *Mario Kaufmann* da «Pro Kitesurfen Schweiz». Ils lieus preferids sajan il Lai da Silvaplauna ed il Lac de Neuchâtel. Cundiziuns idealas puncto vent desser al Lai Rivaun. Ma là prescrivia il chantun Son Gagl ch'ìls kilters stoppian far diever d'ina bartga a motor per ir sin il lai. «Nus essan amis da l'ambient e na vulain

betg esser dependents d'ina bartga a motor», di Kaufmann. Plinavant cumplitgeschian talas prescripziuns il sport ed impedeschian per persunas che n'èn betg da la regiun dad ir sin il lai. Sin l'entir mund saja kitesurfing lubì. El n'enconuschia nagin pajais che scumondia ina disciplina olimpica, di Kaufmann.

Il pionier da Silvaplauna

Stefan Popprath è stà in dals emprims kilters en Svizra. Dapi il 1999 instruescha el kitesurfing a Silvaplauna. La «Kite-Sai-

ling-School-Silvaplauna» occupescha tenor indicaziuns da Popprath quatter persunas e durant la stad anc dudesch ulteriurs magisters. I dettia dis che var 300 kilters vegnian a Silvaplauna – bunamain il dubel dals surfers, di Popprath. Ils sportists procurian la stad per in'impurtanta cumpart da la svieuta turistica.

Ils emprims onns haja quai forsa anc dà problems tranter surfers, kilters u navigaturs – ussa betg pli. In kiter saja pli movibel e possa guntgir pli svelto ch'ìls auters sportists d'aua.



Silvaplauna è il Mekka dals kilters svizzers.